

Die Plattdeutsche Ecke in der WESTFALENPOST

Dao is düese Schaulmagister indusselt un hiät ne wunnerschoinen Dräom har

Beckschäpers Luie – dai Beckschäpers Dieter – dat is en Hären. . . , são hãoge ä dai riutküemmet. . . : in Körbke is hai oinen van diãn büöwersten Schaulmestern un in A-lagen Major bui me Schüttenverein! Dat was me aower não nit genauch – iek segge jao, hai woll não höchter rop – un dao hiätte biuß – en Vuegel afschuotten un is niu Küenig un Majestät un suine laiwe Anni Küenigin!

Dat is ne „Karriere“ – dao kamme blãoß van droimen. . .

Op me Feste hät se diãn Majestäten dann de Opwahrung maket met Mussik un grãotem Tammtamm un Spektakel – dat dai Hofstaat reins iut em Huisken was!

Bui diãn Diskreden gäng et

ock drümme, wat de schoinsten Droime wãören imme Liãwen. . . wevve maol seggen, fũör oinen Schaulmester: Dao is maol en Lãhr wiãst – são ä Dieter oinen is, dai har amme „Katheder“ siãtten in der Schaule – und har de Blagen an der Arbeit. . . ; un wann de Kinner „nũtzlich beschãftigt sind“, dann hiät dai Lãhr guet schlaopen. . .

Un dao is düese Schaulmagister indusselt un hiät são ne wunnerschoinen Drãom – un droimet: Dao is ne Fee kuemmen met drei Wũnsken. . . – und dao har dai Magister sick et oiste wũnsket, hai woll op ne „paradiesische Insel“ suin „in der Sũdsee“ – un rumpstig dao hartre dao siãtten unner

Palmen un Blaumen! Un niu dai twedde Wunsk: Hai woll en biettken Vergnaigen hewwen met schoinen Frauluien – un rumpstig, dao har en half Dutzend nette Schũotterkes ümme iãhne rümme siãtten – „alles Blumenkinder“, dat hai nit wußte, biu un wuot!

Jao, un niu dai leste Wunsk: Jao, et hãr iãhne alles são guet gefallen, hai wöll niu suin Liãwen nit wuier arboien. . . ! Un rumpstig, dao wãrd hai wach un sittet wuier an suinem „Katheder“ in der Schaule!

Dat aower äok Droime un Wũnske in „Erfũllung“ gaohn kãnnt, dat kãnn me an der Küenigin Anni saihn: dai hãr vũör liuter Freude ois kein Waord riut kruigen

konnt. . . ; un dann har se sagt: „Das war mein Lebens-traum, einmal Königin zu sein!“ Ihr

Jupp Balkenhol



Jupp Balkenhol



Der Festzug im Dorf übt immer besondere Anziehungskraft aus.